



萬首唐人絕句卷第十八

五言一百首

中秋

司空圖 七十五首

閑吟秋景外萬事覺悠悠此夜若無月一年虛過秋

偶題

水榭花繁處春晴日午前鳥窺臨檻鏡馬過隔牆鞭

閑步

幾處白煙斷一川紅樹時壞橋侵轍水殘照背村碑

春中

伏溜侵堦潤繁花隔竹香嬌鶯方曉聽無事過南塘

獨望

綠樹連村暗黃花出陌稀遠陂春草綠猶有水禽飛

雜題

孤枕聞鶯起幽懷獨悄然地融春力潤花泛曉光鮮

漫題三首

亂後他鄉節燒殘故園春自憐垂白首猶伴踏青人
齒落傷情久心驚健忘頻蝸廬經歲客蠶市異鄉人
率怕人書謹閑宜酒韻高山林若無慮名利不難逃

河上二首

慘慘日將暮驅羸獨到莊沙痕傍墟落風色入牛羊

新霽田園處夕陽禾黍明沙村平見水深巷有鷗聲

早朝

白日新年好青春上國多街平雙闕近塵起五雲和

即事二首

茶爽添詩句天清瑩道心只留鶴一隻此外是空林
御禮徵竒策人心注盛時從來留振滯只待濟臨危

永夜

永夜疑無日危時只賴山曠懷休戚外孤跡是非間

秦關

形勝今雖在荒涼恨不窮虎狼秦國破狐兔漢陵空

渡江

秋江共僧渡鄉淚滴船回一夜吳船夢家書立馬開

退居漫題七首

花缺傷難綴鶯喧柰細聽惜春春已晚珍重草青青
堤柳自綿綿幽人無恨牽只憂詩病發莫寄校書牋
燕語曾來客花催欲別人莫愁春又過看着又新春
身外都無事山中久避喧破巢看乳燕留果待啼猿
詩家通籍美工部與司勳高賈雖難敵微官偶勝君
努力省前非人生上壽稀青雲無直道暗室有危機
燕拙營巢苦魚貪觸網驚豈緣身外事亦似我勞形

即事九首

宿雨川原霽憑高景物新陂痕侵牧馬雲影帶耕人
十年深隱地一雨太平心匣澁休看劔窻明復上琴
明時那棄置多病自遲留踈磬和吟斷殘燈照卧幽
衰鬢閑生少丹梯望覺危松須依石長鶴不傍人卑
落葉頻驚鹿連峯欲映鷗此生詩病苦此病更蕭條
旅思又驚夏庭前長小松遠峯生貴氣殘月斂衰容
林鳥頻窺靜家人亦笑慵舊居留穩枕歸卧聽秋鐘
華宇知難保燒來又却修只應巢燕惜未必主人留
幽鳥穿籬去隣翁採藥迴雲從潭底出花向佛前開

松滋渡二首

步上短亭久看迴官渡船江鄉宜晚霽楚老語豐年
楚岫積鄉思茫茫歸路迷更堪班竹驛初聽鷓鴣啼

華清宮

帝業山河固離宮宴幸頻豈知驅戰馬只是太平人
牛頭寺

終南最佳處禪誦出青霄群木澄幽寂踈煙汎沈寥

感時上盧相

兵待皇威振人隨國步安萬方休望幸封岳始鳴鑾

亂後三首

喪亂家難保艱虞病懶醫空將憂國淚猶擬洒丹墀
流芳能幾日惆悵又聞蟬行在多新貴幽棲獨長年
世事嘗艱險僧居慣寂寥美香聞夜合清景見寅朝

秋景

景物皆難駐傷春復怨秋旋書紅葉落擬畫碧雲收

避亂

亂離身偶在竄跡任浮沉虎暴荒居迥螢孤黑夜深

長亭

梅雨和鄉淚終年共酒衣殷勤華表鶴羨爾亦曾歸

村西杏花二首

薄膩力偏羸看看愴別時東風狂不惜西子病難醫
肌細分紅脉香濃破紫苞無因留得翫爭忍折來拋

獨坐

幽徑入桑麻塢西逢一家編籬薪帶蟹補屋草和花

借居

借住郊園久仍逢夏景新綠苔行屐穩黃鳥傍窓頻

重陽

菊開猶阻雨蝶意切於人亦應知暮節不比惜殘春

偶書五首

衰謝當何憾惟應悔壯圖磬聲花外遠人影塔前孤

色變鶯雛長竿齊笋籜垂白頭身偶在清夏景還
蜀畫輕成妙吳娃狎共織晚粧留拜月卷上水精簾
獨步荒郊暮沉思遠墅幽平生多少事彈指一時休
掩謗知迎吠欺心見強顏有名人易困無契債難還

雜題九首

病來勝未病名縛便忘名今日甘爲客當時注愍征
暑濕深山雨荒居破屋燈此生無憾處此去作高僧
不須頻悵望且喜脫喧囂亦有終焉意陂南看稻苗
樓帶猿吟迴庭容鶴舞寬暇書因闕畫封藥偶和丹
宴罷論詩久亭高拜表頻岸香蕃舶月洲色海煙春

驛步堤縈閣軍城鼓振橋鷗和湖鴈下雪隔嶺梅飄
帶雪南山道和鍾北闕明太平當共賀開化鳴來聲
舴艋猿偷上蜻蜓燕競飛樵香燒桂子苔濕挂莎衣
溪漲漁家近煙收鳥道高松花飄可惜睡裏洒離騷

古樂府

一葉隨西風君行亦向東知妾飛書意無勞待早鴻

有感

燈影看鬚黑墻陰惜草青歲闌悲物我同是冒霜螢
休休亭

且喜安能保那堪病更憂可憐藜杖者真箇種瓜侯

漫書二首

剩欲逢花折須判冒雨頻清明開漸少莫怕濕新巾
小蝶爾何競追飛不憚勞遠教羣雀見寧悟禍梯高

歲盡二首

明日添一歲端憂柰爾何衝寒出洞口猶校夕陽多
莫話傷心事投春滿鬢霜殷勤共尊酒今歲只殘陽

牡丹

得地牡丹盛曉添龍麝香主人猶自惜錦幕護春霜

亂後

羽書傳棧道風火隔鄉關病眼那堪泣傷心不到閑

春山

可是武陵溪春芳着處迷花明催曙早雲膩惹空低

樂府

寶馬跋塵光雙馳照路旁喧傳報戚里明日幸長楊

亂前上盧相

虜黠雖多變兵驕即易乘猶須勞斥候勿遣大河冰

金谷園

曹松 五首

當年歌舞時不說草離離今日歌舞盡滿園秋露垂

寒食日題杜鵑花

一朵又一朵併開寒食時誰家不禁火揔在此花枝

春草

不獨滿池塘夢中佳句香春風有餘力引上古城墻

春日東齋

三庚到秋伏偶來松檻立熱少清風多開門放山入

南朝

三籬蓋馳道風烈一無取時見牧牛童噴牛喫禾黍

賀顧非熊及第

劉得仁 一首

愚為童稚時已解念君詩及得高科晚須逢聖主知

述懷

崔櫓 一首

白首成何事無歡可替悲空餘酒中興猶似少年時

望歸馬

劉駕 六首

東人望馬歸歸馬蓮峯下蓮峯與地平亦不更徵兵

田西邊

刀劍作犁鋤耕田古城下高秋黍稷多無地放羊馬

樂邊人

在鄉身亦勞在邊腹亦飽父兄若一處任向邊頭老

築臺詞

前杵與後杵築城功不住願我築更高得見秦皇墓

秦娥

秦娥十四五面白於指爪羞人夜采桑驚起戴勝鳥

牧童

牧童見客拜山果懷中落晝日驅牛歸前溪風雨惡

賞殘花

紇干著 一首

零落多依草芳香散着人低簷一枝在猶占滿堂春

遇邊使

盧隱 三首

累年無的信每夜夢邊城袖掩千行淚書封一尺情

移住別友

自到西川住唯君別有情常逢對門遠又隔一重城

朔口逢友人

艱難別離久中外往還深已改當時髮空餘舊日心

採蓮女

霍揆 一首

舟中採蓮女兩兩催粧梳聞早渡江去日高來起居

邊城柳

劉阜 一首

一株新柳色十里斷孤城為近東西路長懸離別情

江濱梅

王適 一首

忽見寒梅樹開花漢水濱不知春色早疑是弄珠人

感事

武瓘 一首

花開蝶滿枝花謝蝶還希唯有舊巢燕主人貧亦歸

江行

柳中庸 一首

繁陰乍隱洲落葉初飛浦蕭蕭楚客帆暮入寒江雨

別童叟

吳筠 三首

平昔同邑里經年不相思今日成遠別相對心悽其

題縉雲嶺永望館

人驚此路險我愛山前深猶恐佳趣盡欲行且沉吟

題山人所居

故人住南郭邀我對芳樽歡暢日云暮不知城市喧

萬首唐人絕句卷第十八

萬首唐人絕句卷第十九

五言一百首

春情

張起一首

畫閣餘寒在新年舊燕歸梅花猶帶雪未得試春衣

題嘉祥驛

孟遲四首

樹頂煙微綠山根菊暗香何人獨鞭馬落日上嘉祥

徐波渡

曉月千重樹春煙十里溪過來還過去此路不堪迷

壯士吟

壯士何曾悲悲即無回期如何易水上未歌淚先垂

懷鄭洎

風蘭舞幽香雨葉墮空滴美人來不來前山看向夕

飲散呈主人

韋莊 五首

夢覺笙歌散空堂寂寞秋更聞城角弄煙雨不勝愁

卽事

亂世時偏促陰天日易昏無言搔白首憔悴倚東門

勉兒子

養爾逢多難常憂學已遲辟疆為上相何必待從師

春早

聞鶯纔覺曉開戶已知晴一帶窓間日斜穿枕上明

贈姬人

莫恨紅裙破休嫌白屋低請看京與洛誰在舊香閨

尋人偶題

邵真 一首

日昃不復午落花難歸樹人生能幾何莫厭相逢遇

登嶺望

許鼎 一首

淼淼三江水悠悠五嶺間鴈來猶不度人去若為還

對月

張喬 一首

盈缺青冥外東風萬古吹何人種丹桂不長出輪枝

題殿前桂葉

盧僎 四首

桂樹生南海芳香隔遠山今朝天上見疑是月中攀

南樓望

去國三巴遠登樓萬里春傷心江上客不是故鄉人

臨川送別

秋郊日半隱野樹煙初映風水正蕭條那堪動離詠

途中

抱玉三朝楚懷書十上秦年年洛陽陌花鳥弄歸人

小院

唐彥謙 四首

小院無人夜煙斜月轉明清宵易惆悵不必有離情

春雪初霽杏花正芳月夜閑吟 唐彥謙

霽景明如練繁英杏正芳姮娥應有語悔共雪爭光

文惠宮人

認得前家令宮人淚滿裾不知梁佐命全是沈尚書

贈竇尊師

我愛竇高士棄官仍在家為嫌勾漏令兼不要丹砂

南海神祠

高駢 五首

滄溟八千里今古畏波濤此日征南將安然渡萬艘

送春

水淺魚爭躍花深鳥競啼春光看欲盡判却醉如泥

海翻

幾經人事變又見海濤翻徒起如山浪何曾洗至冤

筇竹杖寄僧

堅輕筇竹杖一枝有九節寄與沃州人閑步青山月

遣興

把盞非憐酒持竿不爲魚唯應嵇叔夜似我性情疎

登蕪城

儲嗣宗 六首

昔人登此地丘壠已前悲今日又非昔春風能幾時

滄浪峽

滄浪臨古道道上石成塵自有滄浪峽誰爲無事人

垓城

百戰未言非孤軍驚夜圍山河意氣盡淚濺美人衣

村月

月午離南道前村半隱林田翁獨歸處喬麥露花深

早春

野樹花初發空山獨見時踟躕歷陽道鄉思滿南枝

送春

無語共春別細畧枝上紅來年又相見還恐是愁中

自君之出矣

雍裕之 一首

自君之出矣寶鏡爲誰明思君如隴水長聞嗚咽聲

錦

薛瑩 六首

軋軋弄寒機功多力漸微惟憂機上錦不稱舞人衣

羨僧

處世曾無着生前事盡非一餅兼一衲南北去如歸

秋日湖上

落日五湖遊煙波處處愁沉浮千古事誰與問東流

寄舊山隱侶

舊山諸隱倫身在若無身莫鎖白雲路白雲多悞人

訪武陵道者不遇

花發鳥仍啼行行路欲迷二真無問處虛度武陵溪

江山閑望

渺渺無窮盡風濤幾日平年光與人事東去一聲聲

滿公房

綦毋潛 一首

世界蓮華藏行人香火緣燈王照不盡中夜寂相傳

効崔國輔體四首

韓偓 十五首

淡月照中庭海棠花自落獨立俯閑階風動秋千索
酒力惹睡眸鹵莽聞街鼓欲明花更寒東風打窓雨
羅幕生春寒繡窓愁未眠南湖夜半雨應濕采蓮船
雨後碧苔院霜來紅葉樓閑堦上斜日鸚鵡伴人愁

半睡

擡鏡仍嫌重更衣又怕寒宵分未歸帳半睡待郎看

早歸

去是黃昏後，歸當臙牖時。
袂衣吟宿醉，風露動相思。
兩處

樓上淡山橫，樓前溝水清。
憐山又憐水，兩處總牽情。
春閨二首

願結交加夢，因傾潑灑尊。
醒來情緒惡，簾外正黃昏。
氤氳帳裏香，薄薄睡時糝。
長吁解羅帶，怯見上空牀。

花時與錢尊師同醉

在醴陵

橋下淺深水，竹間紅白花。
酒仙同避世，何用厭長沙。

從獵三首

獵犬諳斜路，宮嬪識認旗。
馬前雙兔走，宣示羽林兒。

小鎧狹鞦韆，鞍輕妓細腰。
有時齊走馬，也學唱交交。
蹀躞巴驛駿，陪鯁碧野雞。
忽聞仙樂動，賜酒玉偏提。

與僧

江海扁舟客，雲山一食僧。
相逢兩相語，若箇是南能。
野釣

細雨桃花水，輕漚逆浪飛。
風頭歸阻棹，坐睡倚蓑衣。
迎內子題庭花

盧儲一首

芍藥斬新栽，當庭數朶開。
東風與拘束，留待細君來。

題奉國寺

陸海二首

新秋夜何爽，露下風轉淒。
一磬竹窗外，千燈花塔西。

題龍門寺

窓燈林靄裏門磬水聲中更與龍花會鑪煙滿席風

寄早梅

陸開一首

折梅逢驛使寄與隴頭人江南無所有聊贈一枝春

子夜冬歌

薛耀一首

朔風扣羣林嚴霜凋百草借問月中人安得長不老

感事

高蟾十首

濁河從北下清洛向東流清濁皆如此何人不白頭

楚思

疊浪與雲急翠蘭和意香風流化為雨日暮下巫陽

雪中

金閣倚雲開朱軒犯雪來三冬辛苦樣天意似難裁

道中有感

一醉六十日一裘三十年年華經幾日日日棹征鞭

宋汴道中

平野有千里居人無一家甲兵年正少日夕戍天涯

秋思

天地秦蕭索山川何渺茫不堪星斗柄猶把歲寒量

卽事

三年離水石一旦隱樵漁為問青雲上何人識卷舒

漁家

野水千年在閑花一夕空近來浮世狹何似釣船中

閑中

風雨去愁晚關河歸思涼西遊無直氣一夕九回腸

歸思

紫府歸期斷芳洲別思迢黃金作人世只被歲寒消

送王郎中

錢翊 一首

惜別遠相送却成惆悵多獨歸回首處爭柰暮山河

感興

鄭谷 七首

禾黍不暘艷競栽桃李春翻令力耕者多作賣花人

望湖亭

湘水似伊水湘人非故人登臨獨無語風柳自搖春

采桑

曉陌携籠去桑林路隔淮何如鬪百草賭取鳳凰釵

悶題

落第春相困無心惜落花荆山歸不得歸得亦無家

牡丹

亂前看不足亂後眼偏明却得蓬蒿力遮藏見太平

玉蘂花

唐昌樹已荒天意眷文昌晚入微風起春時雪滿墻

嘉陵

細雨濕淒淒人稀江日西春腸已愁斷不待子規啼

山中即事

郎士元一首

入谷多春興乘舟棹碧潯山雲昨夜雨溪水曉來深

正朝上左丞

楊重玄一首

歲去愁終在春還命不來長吁問丞相東閣幾時開

雪

羅隱二首

盡道豐年瑞豐年事若何長安有貧者為瑞不宜多

寄陸魯望

龍樓李丞相昔歲仰高文黃閣今無主青山竟不焚

登郭隗臺

皇甫松一首

燕相謀在茲積金黃巍巍上者欲何顏使我千載悲

塞上

周朴一首

受降城必破回落隴頭移蕃道北海北謀生今始知

感寓

杜荀鶴四首

大海波濤淺小人方寸深海枯終見底人面不知心

春閨怨

朝喜花艷春暮悲花委塵不悲花落早悲妾似花身

釣叟

茅屋深灣裏釣船橫竹門經營衣食外猶得弄兒孫

馬上作

五里復五里住時無住時日將家漸遠猶恨馬行遲

幽情

李牧一首

幽人惜春暮潭上折芳草佳期何時還欲寄千里道

感事

王鐸一首

擊石易得火扣人難動心今日朱門者曾恨朱門深

羅噴曲六首

劉采春所唱六首

不喜秦淮水生憎江上船載兒夫壻去經歲又經年
借問東園柳枯來得幾年自無枝葉分莫怨太陽偏
莫作商人婦金釵當卜錢朝朝江口望錯忍幾人船

邠年離別日只道住桐廬桐廬人不見今得廣州書

昨日勝今日今年老去年黃河清有日白髮黑無緣

昨日北風寒牽船浦裏安潮來打纜斷搖櫓始知難

南歌子詞三首

裴誠

不知厨中弗爭如炙裏心井邊銀釧落展轉恨還深
不信長相憶擡頭問取天風吹荷葉動無夜不搖蓮
簞蠟為紅燭情知不自由細絲斜結網爭奈眼相鈎

萬首唐人絕句卷第十九

陳遜學校刊
陳敬學

萬首唐人絕句卷第二十

五言一百首

端午侍宴

張說一首

甘露垂天酒芝盤捧御書
含丹希蠅蜓灰骨慕蟾蜍

陽春曲

李白四首

芣苢生前徑含樨落小園春
心自搖蕩百舌更多言

估客樂

海客乘天風將船遠行役
譬如雲中鳥一去無蹤跡

舍利佛

金繩界寶地珍木蔭瑤池
雲間妙音奏天際法蠶吹

摩多樓子

從戎向邊北遠行辭密親借問陰山候還知塞上人

樂府二首

孟郊 五首

綠萍與荷葉同此一水中風吹荷葉在綠萍西復東
蓮花未開時苦心終日卷春水徒蕩漾荷花未開展

征婦怨三首

良人昨日去明月又不圓別時各有淚零落青樓前
生在絲蘿下不識漁陽道良人自戍來夜夜夢中到
漁陽千里道近如中門限中門踰有時漁陽長在眼

金吾子

李益 九首

繡帳博山鑪銀鞍馮子都黃昏莫攀折驚起欲栖烏

鷓鴣詞

湘江斑竹枝錦翅鷓鴣飛處處湘雲合郎從何處歸

立秋前一日覽鏡

萬事銷身外生涯在鏡中惟將滿鬢雪明月對秋風

代人乞花

繡戶朝眠起開簾滿地花春風解人意吹落妾西家

上洛橋

金谷園中柳春來似舞腰何堪好風景獨上洛陽橋

揚州懷古

故國歌鍾地長橋車馬塵彭城閣邊柳偏似不勝春
水宿聞雁

早雁忽爲雙驚秋風水窻夜長人自起星月滿空江
揚州早雁

江上三千雁年年過故宮可憐江上月偏照斷根蓬
下漏樓

話舊今應遠逢春喜又悲看花行拭淚倍覺下樓遲
過友人莊 王維一首

故人具雞黍邀我至田家綠樹村邊合青山郭外斜
過張女郎廟作含嬌曲一首 沈警

命嘯無人嘯含嬌何處嬌徘徊花上月空度可憐宵
靡靡春風至微微春露輕可惜關山月還成無用明

嘲趙郎中

賀遂涉一首

員外由來美郎中望不優寧知粉署裏翻作土山頭

荅

趙謙光一首

錦帳隨情設金鑪任意薰唯愁員外置不應列星文

贈柳先生

僧皎然十九首

一見嵩山老吾生恨太遲問君年幾許曾見上皇時

酬李紆補闕

不住東山寺雲泉處處行近臣那得識禪客本無名

湖南蘭若

未到無爲岸空憐不繫舟東山白雲意歲晚尚悠悠

答李蘭

天女來相試將花欲染衣禪心竟不起還捧舊花歸
法華寺望高峰贈如獻上人

峰色秋天見松聲靜夜聞影孤長不在行道入深雲

贈陸羽

只將陶與謝終日可忘情不欲多相識逢人嬾道名

留別閻士和

不慣人間別多應忘別時逢山又逢水只却恐來遲

浣紗女

清淺白沙灘綠蒲尚堪把家住水東西浣紗明月下

界石守風望天竺靈隱

山頂東西寺江中旦暮潮歸心不可到松路在青霄

九日與陸處士飲茶

九日山僧院東籬菊也黃俗人多泛酒誰解助茶香

望遠邨

林杪不可分水步遙難辨一片山翠邊依稀見邨遠

惜暮景

疎陰花不動片景松梢度夏日舊來長佳遊何易暮

待山月

夜夜憶故人長教山月待今宵故人至山月知何在

雜興二首

人生分已定富貴豈妄來不見海底泥飛上成塵埃
吾道本無我未曾嫌世人如今到城市彌覺此心真

前溪作

春歌已寂寂古水自淙淙徒誤時人輩傷心作逝川

偶作

樂禪心自蕩吾道不朽獨晤歌還笑誰言老更狂

春陵登望

西底空流水東垣但聚雲最傷梅嶺望花雪正紛紛

寄朱兵曹

獨自聽寒更寒更發還住一夜千萬聲幾聲到君處

少年行二首

貫休 四首

自奉五色毬進入他人宅却捉蒼頭奴玉鞭打一百
面白如削玉猖狂曲江曲馬上黃金鞍適來新賭得

春野作

大牛若耕田乳犢望似泣萬事皆天意綠草頭叢叢

寒江上望

荒岸燒未死白雲凝不動極目無人行浪打取魚籠

懷故園

脩睦

故園歸未得此日意何傷獨坐水邊草水流春日長

題天姥

靈澈

天台眾峰外歲晚當寒空有時半不見崔嵬在雲中

遠公墓

古墓石稜稜寒雲晚景凝空悲虎溪月不見雁門僧

城上吟

子蘭

古塚密於草新墳侵古道城外無間地城中人又老

放鷺鷥

齊己

潔白雖堪愛腥膻不奈何到願從所欲還汝舊滄波

送僧遊香山寺

君到香山寺探幽莫損神且尋風雅主細看樂天真

撲滿子

祇愛滿我腹爭知滿害身到頭須撲破却散與他人

風

薛濤

獵蕙微風遠飄絃唳一聲林梢明浙瀝松徑夜淒清

宣上見示與諸公唱和

許厠高齊唱涓泉定不知可憐譙記室流水滿禪居

蟬

露滌音清遠風吹故葉齊聲聲似相接各在一枝棲

月

魄依鈎樣小扇逐漢機團細影將圓質人間幾處看
池上雙鳧

雙棲綠池上朝去暮飛還更憶將雛日同心蓮葉間

春望詞四首

花開不同賞花落不同悲欲問相思處花開花落時
檻草結同心將以遺知音春愁正斷絕春鳥復哀吟
風花日將老佳期猶渺渺不結同心人空結同心草
那堪花滿枝翻作兩相思玉簪乘朝鏡春風知不知

陳情上韋令公

聞道邊城苦今來到始知羞將門下唱唱與隴頭兒

採桑

郎大家宋氏一首

春天南雁歸日去西蠶遠妾思紛何極客遊殊未返

映水曲

范靜妻沈氏六首

輕鬢學浮雲雙蛾擬初月水澄正落釵萍開理垂髮

昭君歎二首

早信丹青巧重貨洛陽師千金買蟬鬢百萬寫蛾眉
今朝猶漢地明日入胡關情寄南雲反思逐北風還

登樓曲

憑高川陸近望遠阡陌多相思隔重嶺相憶恨長河

越城曲

別怨悽歌響離啼濕舞衣願假烏棲曲翻從南向飛

當壚曲

透迤飛塵唱宛轉繞牀聲調絃可以進蛾眉畫未成

題洛苑梧葉上

明皇宮人 二首

一入深宮裏年年不見春聊題一片葉寄與有情人

別本

舊本悲秋扇新恩寄早春聊題一片葉將寄接流人

同前

宣宗宮人 一首

流水何太急深宮盡日間殷勤謝紅葉好去到人間

途中覽鏡

徐九臯 一首

四海遊長倦百年行半侵賴窺明鏡裏時見丈夫心

湘中怨諷

鄭僕射 一首

青鷁苦幽獨隔江相對稀夜寒蘆葉雨空作一聲歸

更著宴詞

沈詢 一首

莫打南來雁從他向北飛打時雙打取莫遣兩分離

芭蕉

路德延 一首

一種靈苗異天然體性虛葉如斜界紙心似倒抽書

明月三五更

崔氏鶯鶯 二首

待月西廂下迎風戶半開拂墻花影動疑是玉人來

絕張生

棄置今何道當時且自親
還將舊來意憐取眼前人

伊川歌五首

蓋嘉運 十四首

聞道黃花戍頻年不解兵
可憐閨裏月偏照漢家營
千里東歸客無心憶舊遊
挂帆遊白水高枕到青州
桂殿江鳥對雕屏海燕重
祇應多釀酒醉把樂高鍾
行樂三陽早芳菲二月春
閨中紅粉態陌上看花人
君住孤山下煙深夜徑長
轅門度綠水游苑遠垂楊

陸州歌七首

分野中峰變陰晴衆壑殊
欲投人處宿隔浦問樵夫
共得煙霞逕東歸山水遊
蕭蕭望林夜寂寂坐中秋
香氣傳空滿妝花映薄紅
歌聲天仗外舞態御樓中
樹發花如錦鶯啼柳若絲
更逢歡宴地愁見別離時
明月照秋葉西風響夜砧
彊言徒自亂往事不堪尋
坐對銀缸曉停留玉筯
痕君門常不見無處謝前恩
曉月當窻滿征人出塞迢
迢畫樓終日閉清管為誰調

水調歌二首

雙帶仍分影同心巧結香
不應頻換彩意欲媚紅妝
閨燭無人影羅屏有夢魂
近來音耗絕終日望君門

凱樂歌三首 破陣樂

受律辭元首相將討叛臣咸歌破陣樂共賞太平人
賀聖歡

四海皇風被千年德水清戎衣更不着今日告功成
君臣同慶樂

主上開昌曆臣忠奉大猷君看偃革後便是太平秋
題玉泉溪

湘驛女子一首

紅樹醉秋色碧溪彈夜弦佳期不可再風雨杳如年

詠兔

蘇頌一首

兔子死蘭彈持來挂竹竿試將明鏡照何異月中看
西鄙哥舒歌一首

北斗七星高哥舒夜帶刀至今窺牧馬不敢過臨洮

萬首唐人絕句卷第二十

萬首唐人絕句卷第二十一

五言一百首

樂府詞二十二首

長命女

雲送關西雨風傳渭北秋孤燈然客夢寒杵搗鄉愁

一片子

柳色青山映梨花雪鳥藏綠窻桃李下閒坐歎春芳

甘州

欲使傳消息空書意不任寄君明月鏡偏照故人心

濮陽女

雁來書不至月照獨眠房
賤妾多愁思不堪秋夜長
山鷓鴣二首

玉關征戍久空閨人獨愁
寒露濕青苔別來蓬鬢秋
人坐青樓晚鶯語百花時
愁多人自老腸斷君不知
浣紗女二首

南陌春風早東鄰去日斜
千花開瑞錦香撲美人車
長樂青門外宜春小苑東
樓開萬戶上人向百花中

戎渾

風勁角弓鳴將軍獵渭城
草枯鷹眼疾雪盡馬蹄輕
墻頭花

蟋蟀鳴洞房梧桐落金井
爲君裁舞衣天寒剪刀冷

楊下采桑

飛絲惹綠塵軟葉對孤輪
今朝入園去物色強看人

胡渭川

楊柳千尋色桃花一苑芳
風吹入簾裏唯有惹衣香

金殿樂

入夜秋砧動千門起四鄰
不綠樓上月應爲隴頭人

思歸樂

晚日催絃管春風入綺羅
杏花如有意偏落舞衫多

穆護砂

玉管朝朝弄清歌日日新折花當驛路寄與隴頭人

崑崙子

楊子談經去淮王載酒過醉來啼鳥換坐久落花多

涼州歌

開篋淚霑濡見君前日晝夜臺空寂寞猶是紫雲車

夜襖曲二首

昨見春條綠那知秋葉黃蟬聲猶未斷寒雁已成行
何處堪愁思花開長樂宮君王不重客泣淚向春風

大酺樂

淚滴珠難盡容殘玉易銷倘隨明月去莫道夢魂遙

長干曲

逆浪故相邀菱舟不怕搖妾家楊子住便弄廣陵潮

于闐采花

山川雖異所草木尚同春亦如溱洧地自有采花人

蜀門與林蘊分路

歐陽詹

二首

村步如延壽川原似福平無人相共識獨自故鄉情

讀周太公傳

論兵去商虐講德興周道屠沽未遇時豈異茲川老

秋燈

王建

十一首

向壁暖悠悠對幃寒寂寂斜照碧山圓松間一片石

水精

映色水不別向光月還度傾在荷葉中有人看是露

香印

閒坐燒香印滿房松栢氣火盡轉分明青苔碑上字

落葉

陳綠向參差初紅已重疊中庭新掃地繞池三兩葉

園果

雨中梨果病每樹無數箇小兒出入看一半鳥啄破

野菊

晚艷出荒籬冷香着秋水憶向山中見伴蟲石壁裏

荒園

滿園霜牛衝籬落壤掃掠黃葉中時時一窠薤

晚蝶

翅嫩如水繞砌乍依風日高霜露解飛入菊花中

小松

小松初數尺未有直生枝閒即傍邊立看多長却遲

戲酬盧秘書

芸香閣裏人採摘御園春取此和仙藥猶治老病身

別自栽小樹

去年今日栽臨去見花開好住守空院夜間人不來

奉和元日賜羣臣栢葉 趙彥昭 一首

器乏雕梁器材非造厦材但將千歲葉常奉萬年杯

同前 李义 一首

勁節凌霜勁芳心待歲芳能令益人壽非止麝全香

同前 武平一 一首

綠葉迎春綠寒枝歷歲寒願持栢葉壽長奉萬年歡

酬崔法曹遺劍 戴叔倫 十七首

臨風脫佩劍相勸靜胡塵自料無筋力何由答故人

敬報孫常州二首

衰病苦奔走未嘗追舊遊何言問憔悴此日駐方舟

遠道曳故屐餘春會高齋因言別離久得盡平生懷

將赴東陽留上包諫議

敝邑連山遠仙舟數刻同多慚屢回首前路在泥中

答崔法曹

後會知不遠今歡亦願留江天梅雨散況在月中樓

問嚴居士易

自公來問易不復待加年更有垂簾會遙知續草玄

新年第二夜答處上人宿玉芝觀見寄

陽春已三日會友聞昨夜可愛剡溪僧獨尋陶景舍

赴撫州對酬崔法曹曉燈離暗室五首

雨落濕孤客心驚比棲鳥空階夜滴繁相亂應到曉
高會棗樹宅清言蓮社僧兩鄉同夜雨旅館又無燈
離字一首見第九卷

離室雨初晦客程雲斗暗方爲對吏人敢望郵童探
縱酒常擲盞狂歌時入室離羣怨雨聲幽抑方成疾
又酬夜雨滴空塔五首

知疑奸叟謗聞與情人話猶是別時燈不眠同此夜
寒燈揚曉焰重屋驚春雨應想遠行人路逢泥濘阻
燈光照虛屋雨影懸空壁一向簷下聲遠來愁處滴
楚僧話寂滅俗慮比虛空賴有殘燈喻相傳昏暗中

雨聲亂燈影明滅在空塔併在五言贈知同萬里懷

同賦龍沙墅

回轉沙岸近欹斜林嶺重因君訪遺跡此日見真龍

九月十日

李白一首

昨日登高罷今朝更舉觴菊花何太苦遭得兩重陽

夜集聯句

顏真卿一首

寒花護月色墜葉占風音茲夕無塵慮高雲共片心

題慈恩塔

荆叔一首

漢國河山在秦陵草樹深暮雲千里色無處不傷心

幽州元日

張說二首

今歲元日樂不謝去年春知向來心道誰為昨夜人

三月閨怨

三月時將盡空房妾獨居蛾眉愁自結鬢髮沒情梳

立秋

劉言史 一首

茲晨戒流火商飈早已驚雲天收夏色木葉動秋聲

夏至日作

權德輿 一首

璿樞無停運四序相錯行寄言赫曦景今日一陰生

剪綵花

雍裕之 二首

敢競桃李色自呈刀尺功蝶猶迷剪翠人豈辯裁紅

三月晦日送客

野酌亂無巡送君兼送春明年春色至莫作未歸人

聽琴

王玄 一首

拂塵開按匣何事獨顰眉古調俗不樂正聲君自知

對雨送人

崔署 一首

別愁復兼雨別淚還如霰寄心海上雲千里長相見

贈李中華

梁鎰 一首

莫向嵩山去神仙多誤人不如朝魏闕天子重賢臣

晦日送窮二首

姚合

年年到此日瀝酒拜街中萬戶千門看無人不送窮

送窮窮不去相泥欲何為今日官家宅淹留又幾時

古人皆恨別此別恨銷魂只是空相送年年不出門
醉吟三首 洪崖先生張蘊

去歲無田種今春乏酒材從他花鳥笑伴醉臥樓臺
下調無人采高心又被瞋不知時俗意教我若爲人
入市非求利過朝不爲名有時隨俗物相伴且營營

閏月七日

王灣一首

耿耿曉河微神仙此會稀今年七月閏應得兩回歸

九日

王勃一首

九日重陽節開門有菊花不知來送酒若箇是陶家

嘲三月十八日雪

溫庭筠一首

三月雪連夜未應傷物華只緣春欲盡留着伴梨花

寒食日戲贈李侍御

盧延讓一首

十二街如市紅塵咽不開酒蹄驄馬汗沒處看花來

公子家

聶夷中 三首

種花滿西園花發青樓道花下一禾生去之爲惡草

田家二首

後一首李紳亦有

父耕原上田子斲山下荒六月禾未秀官家已修倉
鋤田當日午汗滴禾下土誰念盤中餐粒粒皆辛苦

戲題莆田受杖染人壁

柳逢一首

紫綠終朝染因何不識非莆田竹木貴背負十柴歸

重陽日陪元魯山登北城留別

首七蕭穎士

山縣遶古堞悠悠快登望
雨餘秋天高目盡無隱狀
綿連滄川迥杳眇鴉路深
彭澤興不淺臨風動歸心
賴茲鳴琴暇傲睨傾菊酒
人和歲已登從政復何有
遠山十里竝一道銜長雲
青霞半落日混合疑晴暝
漸聞驚栖羽坐歎清夜月
中歡愴有違行子念明發
僅能泯寵辱未免傷別離
江湖不可忘風雨勞相思
明時當盛才短伎安所設
何日謝百里從君漢之蒞

九日進茱萸山五首

徐行先

家居洛城下舉目見嵩山
刻作茱萸節情生造化間

黃花宜泛酒青岳好登高
稽首明庭內心爲天下勞
菊酒携山客茱萸繫牧童
路疑尋大塊人似問鴻濛
九日重陽數三秋萬寶成
時來謁軒后罷去坐蓬瀛
晚節歡重九高山上五千
醉中知偶聖夢裏見尋仙

江令於長安歸揚州九日賦

許敬宗

首三

心逐南雲逝形隨北鴈來
故鄉籬下菊今日幾花開

擬江令

本逐征鴻去還隨落葉來
菊花應未滿請待詩人開

同前擬

遊人倦蓬轉鄉思逐鴻來
偏想臨潭菊芳藥對誰開

寄融上人

皎然 二首

常愛西林寺池中月在時芭蕉一片葉書取寄吾師

送靈澈

我欲長生夢無心解傷別千里萬里心只似眼前月

遠意

女郎梁瓊 一首

脉脉長攄氣微微不離心叩頭從此去煩惱阿誰禁

續父井梧吟

薛濤 一首

庭除一古桐聳榦入雲中枝迎南北鳥葉送往來風

萬首唐人絕句卷第二十一

萬首唐人絕句卷第二十二

五言一百首

狀江南十二日景十二首

鮑防

江南孟春天苻葉大如錢白雪裝梅樹青袍似葑田

謝良輔

江南仲春天細雨色如煙疎爲武昌柳布作石門泉

嚴維

江南季春天萼菜細如絃湖邊草作徑湖上葉如船

賈弇

江南孟夏天
慈竹笋如編
蜃氣為樓閣
蛙聲作管絃
樊珣

江南仲夏天
時雨下如川
盧橘垂金彈
甘蕉吐白蓮
范燈

江南季夏天
身熱汗如泉
蚊蚋成雷澤
袈裟作水田
鄭槩

江南孟秋天
稻花白如瓊
素腕慚新藕
殘妝如晚煙
沈仲昌

江南仲秋天
鱉鼻大如船
雷是樟亭浪
苔為界石錢
劉蕃

江南季秋天
栗實大如拳
楓葉紅霞舉
蘆花白浪穿
謝良輔

江南孟冬天
荻穗軟如綿
綠絹芭蕉裂
黃金橘柚懸
呂渭

江南仲冬天
紫蔗節如鞭
海將鹽作雪
山用火耕田
丘丹

江南季冬天
紅蟹大如扁
湖水龍為鏡
鑪峰氣作煙
太宗一首

太原召侍臣守歲

四時運灰琯
一夕變冬春
送寒餘雪盡
迎歲早梅新

續薛令之
明皇二首

啄木觜距長鳳凰毛羽短若嫌松桂寒任逐桑榆暖
潼關口號

河曲回千里關門限二京所嗟非恃德設險致天平

宮中題

文宗二首

輦路生春草上林花發時憑高何限意無復侍臣知

夏日聯句

下句柳公權

人皆苦炎熱我愛夏日長薰風自南來殿閣生微涼

贈婦

鄰士一首

吹火朱脣動添薪玉腕斜遙看煙裏面大似霧中花

戲膳部

張敬忠一首

有意嫌兵部專心取考功誰知腳踏蹬却落省墻東

題僧院二首

呂羣

路行三蜀盡身及一陽生賴有殘燈火相依坐到明

社後辭巢燕霜前別蒂蓬願爲蝴蝶夢飛去覓關中

識詩

李遐周一首

燕市人皆去函關馬不歸若逢山下鬼環上繫羅衣

題潞州壁

僧普滿一首

此水連涇水雙珠血滿川青牛將赤虎還賀太平年

同夫游秦

元載妻王氏一首

路掃饑寒跡天哀志氣人休零離別淚携手入西秦

送韋生酒

鮑生妾一首

白露濕庭砌素月臨前軒此時去留恨含思獨無言

陳嬌詞

鸚鵡阿蘇兒一首

昔請馬相如爲作長門賦從使費百金君王終不顧

迎月二首

水府真君

日落煙水黯驪珠色豈昏寒光射萬里霜縞遍千門

玉魄東方開嫦娥逐影來洗心兼滌目光景游春臺

贈劉商

廣陵道士一首

無事到揚州相携上酒樓藥囊爲贈別千載更何求

贈郭翰二首

織女

河漢雖云闊三秋尚有期情人終已矣良會更何時

朱閣臨清漢瓊宮結紫房佳期情在此只是斷人腸

荅二首

郭翰

人世將天上由來不可期誰知一回顧更作兩相思

贈枕猶香澤啼衣尚淚痕玉顏霄漢裏空有往來魂

五真導意五首

共步雲山卧馬信真

幾劫澄煩思今身僅小成誓將雲外隱不向世間行

徐湛真

綽約離塵世從容上太清雲衣無綻日鶴駕沒遙程

華岳無三尺東瀛僅一杯入雲騎彩鳳歌舞上蓬萊

共作雲山侶俱辭世界塵靜思前日事拋却幾年身

正楊敬真

人世徒紛擾其生似薜華誰言今夕裏俛首視雲霞

游兜玄國

張佐一首

風暖景和異異香馥林塘登高一長望信美非吾鄉

贈沈警鏡

張女郎一首

憶昔窺寶鏡相望看明月彼此俱照人莫令光影滅

贈沈警

小女郎二首

心纏萬結縷結縷幾千回結怨無窮極結心終不開

別後篇

飛牋報沈郎尋已到衡陽若存金石契風月兩相望

感懷示許漢陽

洞庭龍女一首

海門連洞庭每去三千里十載一歸來辛苦瀟湘水

贈楊正伯

女郎一首

君子竟迷執無由達情素明月海上山秋風獨歸去

冢上答唐太宗

慕容垂一首

我昔勝君昔君今勝我今榮華各異代何用苦追尋

夜吟

巴峽人一首

秋徑填黃葉寒崖露草根猿聲一叫斷客淚數重痕

謝人致祭

河湄枯骨一首

我本邯鄲士祗役死河濱不得家人哭勞君行路悲

感巫州薺菜

高力士一首

兩京作斤賣五溪無人採夷夏雖有殊氣味終不改

贈亡妻張氏

唐暄一首

嶧陽桐半死延津劍一沈如何宿昔內空負百年心

荅二首

張氏

不分殊幽顯那堪異古今陰陽途自隔聚散兩難心

蘭堦鬼月斜銀燭半含花自憐長夜客泉路以為家

寄夫周混

韋璜一首

不得長相守青春天薜華舊遊今永已泉路却為家

題虎丘山上

幽獨君一首

幽明雖異路平昔忝工文欲知潛寐處山北兩孤墳

洋州館亭吟

竇裕一首

家依楚水岸身寄洋州館望月獨相思塵襟淚痕滿

夢贈沈萇浮雲詩

陸憑一首

虛虛復空空瞬息天地中假合成此像吾亦非吾躬

悲吟呈李績

韓弁一首

我有敵國讐無人可為雪每至漳河頭送魂自嗚咽

贈李章武二首

王氏婦

河漢已傾斜神魂欲超越願郎更回抱終天從此訣
昔辭懷後會今別便終天新悲與舊恨千古閉窮泉

荅王婦二首

李章武

分從幽顯隔豈謂有佳期寧辭重重別所歎去何之
後期杳無約前恨已相尋別路無行信何因得寄心

贈臨淄縣主

獨孤穆一首

金閨久無主羅袂坐生塵願作吹簫伴同為騎鳳人

荅獨孤穆

縣主一首

朱軒下長路青草啓孤墳猶勝陽臺上空看朝暮雲

來家娘子歌一首

平陽縣中樹久作廣陵塵不意何郎至黃泉重見春

述懷示祖價三首

商山孤館書生

家住驛北路百里無四鄰往來不相問寂寂山家春
南岡夜蕭蕭青松與白楊家人應有夢遠客已無腸
寒草白露裏亂山明月中是夕苦吟罷寒燭與君同

獨遊家園

萬商妻孟氏二首

可惜春時節依前獨自遊無端兩行淚長祗對花流

賦少年

誰家少年兒心中暗自欺不道終來可可即恐郎知

報孟氏

少年一首

神女配張碩文君遇長卿逢時兩相得聊足慰多情

幽恨篇

安邑坊女子一首

卜得上峽日秋天風浪多江陵一夜雨腸斷木蘭歌

贈沈恭禮

湖城女密陀僧一首

黃帝上天時鼎湖元在茲七十二玉女化作黃金芝

商館聯句二首

蕭中郎

秋月圓如鏡秋風利似刀秋雲輕比絮秋草細同毛

山樹高高影山花寂寂香山天遙歷歷山水急湯湯

和鄭郊吟

陳蔡間冢中人一首

冢上兩竿竹風吹常裊裊下有百年人長眠不知曉

寄兄

李叔霽一首

忽作無期別沈寘恨有餘長安雖不遠無信可傳書

夢中贈主

崔暇妾一首

莫以貞留妾從他理管絃容華難久駐知得幾多年

夢寄夫

蘇檢妻一首

楚水平如鏡周回白鳥飛金陵幾多地一去不知歸

題州牧廳

昌州鬼一首

物類易遷變我行人不見珍重任彥思相別日已遠

題戶牖

張不疑青衣金條首

幽室鎖妖艷無人蘭蕙芳春風三十載不盡羅衣香

謔隴城杜令二首 東柯院妖

雖共蒿蘭伴南朝有宗祖莫打綠袍人空中且歌舞

堪憐木邊土非兒不似女瘦馬上高山登臨何自苦

為楊稹歌

石龕寺紅裳一首

金殿不勝秋月斜石樓冷誰是相顧人褰幃弔孤影

對牛虎吟

窰茵一首

曉讀雲水靜夜吟山月高焉能履虎尾豈用學牛刀

南山將軍班寅一首虎

但得居林嘯焉能當路蹲渡河何所適終是怯劉琨

桃林處士班特一首牛

無非憐窰戚終是怯庖丁若遇龔為守蹄涔向北溟

摘萱草吟

魏王池畔女子一首猿

彼見是忘憂此看同腐草青山與白雲方展我懷抱

贈焦封

蜀道夫人二首猩猩

妾失鴛鴦伴君方萍梗遊少年懽醉後必恐苦相留

送焦封

鵲橋織女會也是不多時今日送君處羞言連理枝

酬夫人

焦封二首

心常名宦外終不恥狂遊悞入桃源裏仙家爭肯留

留別

但保同心結無勞織錦詩蘇秦求富貴自有一回時

夢中唱送胡人酒二首 張生妻

切切夕風急露滋庭草濕良人去不回馬知掩閨泣

螢火穿白楊悲風入荒草疑是夢中遊愁迷故園道

歌送張生妻

長鬚人一首

花前始相見花下又相送何必言夢中人生盡如夢

贈內

申屠澄一首

一宦慚梅福三年愧孟光此情何所喻川上有鴛鴦

妻荅一首

真符女子
虎

琴瑟情雖重山林志自深常憂時節變辜負百年心

銅駝坊柳二首

柳藏經

寒水停圓沼秋池滿敗荷杜門窮典籍所得事全多

誰謂三才貴予觀萬化同心虛嫌蠹食年老怯狂風

夢人贈詩

盧獻卿一首

上築郊原古青山唯四鄰扶疏繞屋樹寂寞獨歸人

寄非煙

趙象一首

一觀傾城貌塵心只自猜不隨蕭史去擬學阿蘭來

別酒主人

山中客一首

酒盡君莫沽壺乾我當發城市多囂塵還山弄明月

萬首唐人絕句卷第二十二

萬首唐人絕句卷第二十三

五言一百首

贈同游者

韓愈一首

喚起窻前曙催歸日未西無心花裏鳥更與盡情啼

上崔相

李白三首

邯鄲四十萬同日陷長平能回造化筆或冀一人生

寄上吳王

坐嘯廬江靜閒聞進玉觴去時無一物東壁挂胡牀

紫藤樹

紫藤挂雲木苑蔓宜陽春密葉隱歌鳥香風留美人

古調 一見前

劉禹錫 二首

簿領乃俗士清談信古風吾觀蘇令綽朱墨一何工

红柿子

曉連星影出晚帶日光懸本因遺采掇翻自保天年

鶴

白居易 二首

人各有所好物固無常宜誰謂爾能舞不如閒立時

題元少尹集後 一見前

遺文三十軸軸軸金玉聲龍門原上土埋骨不埋名

登樓見白鳥

李益 二首

一鳥如霜雪飛下白樓前問君何以至天子太平年

乞寬禪師瘦山壘

石色疑秋蘚峰形若夏雲誰留柰苑地好贈杏磯君

晚屆鳳州

王勃 九首

寶雞辭舊城仙鳳歷遺墟去此近城闕青山明月初

羈春

客心千里倦春事一朝歸還傷北園裏重見落花飛

林塘懷友

芳屏畫春草仙杼織朝霞何如山水路對面即飛花

山扉夜坐

抱琴開野室携酒對時人林塘花月夜別似一家春

春莊

山中蘭葉徑城外李桃園直知人事靜不覺鳥聲喧

春遊

客念紛無極春淚倍成行今朝花樹下不覺戀年光

春園

山泉兩處晚花柳一園春還持千日醉共作百年人

林泉獨飲

丘壑經塗賞花柳遇時春相逢令不醉物色自輕人

登城春望

物外山川近晴初景靄新芳郊花柳遍何處不宜春

贈道者

馬戴 三首

深居白雲穴靜注赤松經往往龍潭上焚香禮斗星

華下逢楊侍御

巨靈掌上月玉女盆中泉柱史息車看孤雲心浩然

新春聞赦

道在猜讒息仁深疾苦除堯聰能下聽湯網本來踈

憶長安曲

一首在前 岑參 四首

長安何處在只在馬蹄下明日歸長安為君急走馬

賀延磧作

沙上見日出沙上見日沒悔向萬里來功名是何物

寄韓樽使北

夫子素多疾別來未得書北庭苦寒地體內今何如

題僧讀經堂

結室開三藏焚香老一峰雲間獨坐臥只是對杉松

題佛殿前孤石

劉長卿一首

孤石自何處對之如舊游氛氳峴首夕青翠剡中秋

陪孟都督祭岳

韓翃一首

封疆七百里祿秩二千石擁節祠泰山寒天霜草白

雜詩

李端一首

主第辭高飲石家赴宵會金谷走車來王人騎馬待

感興

雍陶二首

貧女貌非醜要須緣嫁遲還似求名客無媒不及時

長安客感

日過千萬家一家非所依不及行塵影猶隨馬蹄蹄

石請客

盧仝五首

竹弟雖讓客不敢當客恩自慚埋沒久滿面蒼苔痕

客荅石

遍索天地間彼此最癡癡主人幸未來與君為莫逆

馬蘭請客

蘭蘭是小草不怕郎君罵願得隨君行暫到嵩山下

蛺蝶請客

粉末為四體春風為生涯願得紛飛去與君為眼花

客請蛺蝶

君是輕薄子莫窺君子腸且須看雀兒雀兒銜爾將

嘲胡子小男

姚合 一首

明明復夜夜胡子忽成翁唯是真如性不來生滅中

野鴨

李羣玉 一首

鷓鴣借毛衣喧呼鷹隼稀雲披麥藻地任汝作羣飛

弔賈員外

鄭谷 三首

八韻與五字俱為時所傳幽魂應自慰李白墓相連

乳毛松

松格一何高何人號乳毛霜天寓直夜愧爾伴閑曹

樗里子墓

賢人骨已銷墓樹幾榮凋正直魂如在齋心願一招

招玉川子詠新文

徐希仁 一首

清氣宿我心結為清冷音一夜吟不足君來相和吟

竒路温州

皎然 七首

欲問采靈藥如何學無生愛鶴頗似君且非求仙情

贈顏主簿

漢家儀禮盛名教出諸顏更說尚書後能文有子山

渡前溪

不意入前溪愛溪從錯落清清鑑不足非是深難度

問天

天翁何時有談者皆不經誰道賢人死今爲傳說星

偶作三首

真隱不須驕忘名要似愚只將兩條事空却漢潛夫
虜語嫌不學胡音從不翻說禪顛倒是樂毅金王孫
偶世寂無喧吾心了性源可嫌蟲蝕木不笑馬能言

四氣

雍裕之 二十首

春禽猶競嘯夏木忽交陰稍覺秋山遠俄驚冬霰深

四色四首

壺中冰始結盤上露初圓何意瑤池雪欲奪鶴毛鮮
道士牛已至仙家鳥亦來骨爲神不朽眼向故人開
勞魴蓮渚內汗馬火旂間平生血誠盡不獨左輪殷
已見池盡墨誰言突不黔漆身恩未報貂裘弊豈嫌

大言

四溟杯淥醕五嶽髻青螺揮汗曾成雨畫地亦成河

細言

蚊眉自可託蝸角豈勞爭欲効絲毫力誰知螻蟻誠

雜題十首

山中桂

八樹拂丹霄四時青不凋秋風何處起先裊最長條

蘆花

夾岸復連沙枝枝搖浪花月明渾似雪無處認漁家

江邊柳

娟娟古堤邊青青一樹煙若爲絲不斷留取繫郎船

江上山

綺霞明赤岸錦纜繞丹枝楚客正愁絕西風且莫吹

游絲

游絲何所似應最似春心一向風前亂千條不可尋

柳絮

無風纔到地有風還滿空緣渠偏似雪莫近鬢毛生

殘鶯

花闌鶯亦懶不語似含情何言百轉舌唯餘一兩聲

早蟬

一聲清潯暑幾處促流年志士心偏苦初聞獨泫然

秋蛩

雨絕蒼苔地月斜青草階蛩鳴誰不怨況是正離懷

江上聞猿

楓岸月斜明猿啼旅夢驚愁多腸易斷不待第三聲

折柳贈行人

那言柳亂垂盡日任風吹欲識千條恨和煙折一枝

題蒲葵扇

傾心曾向日在手幸搖風羨爾逢提握知名自謝公

贈苦行僧

幽深紅葉寺清淨白毫僧古殿長鳴磬低頭禮畫燈

題灞池

王昌齡二首

開門望長川薄暮見漁者借問白頭翁垂綸幾年也

送劉十五之郡

平明江霧寒客馬江上發扁舟事沿陽窅窅含楚月

過白起墓

曹業五首

夷陵火焰滅長平王氣低將軍臨老病賜劍咸陽西

怨詩三首

二首在前

短髮一如螭長眉一如蛾相共棹蓮舟得花不如他

手推謳軋車朝朝暮暮耕未曾分得穀空得老農名

情詩二首

二首在前

檳榔自無柯柳葉自無陰常羨亭前竹生筍高於林

野雀滿城饑交交復飛飛勿怪官倉粟官倉無空時

傷小女

皮日休一首

一歲猶未滿九泉何太深唯餘卷書草相對共傷心

寒食

李崇嗣一首

普天皆滅焰匝地盡藏煙不知何處火來就客心燃

賀邊軍支春衣二首 柳公權

去歲雖無戰今年未得歸皇恩何以報春日得春衣

挾纊非真纊分衣是假衣從今貌武士不憚戍金微

香爐峰

徐凝一首

香爐一峰絕頂在寺門前盡是玲瓏石時生日暮煙

下第

劉得仁一首

外族帝王是中朝親舊稀翻令浮議者不使九霄飛

題青龍精舍

盧駢一首

壽夭雖云命榮枯亦大偏不知雷氏劍何處更衝天

訪韋楚老不遇

李德裕一首

昔日徵黃綺余慚在鳳池今來招隱士恨不見瓊枝

貢院寄前主司

劉太真一首

獨坐貢闈裏愁心芳草生山公昨夜事應見此時情

戲妻族語不正

胡曾一首

呼十却為石喚針將作真忽然雲雨至總道是天因

贈朱朴

廬山女子 鯉魚一首

但持冰潔心不識風霜冷任是懷禮容無人顧形影

贈賈松先輩

水心寺僧 一首

嗟峨山上石歲歲色長新若使盡成實誰爲知己人

吟示歐陽訓

新林驛女子

一首 飛生蟲

月明階悄悄影隻腰身小誰是騫翔人願爲比翼鳥

景龍童謠一首

可憐聖善寺身著綠毛衣牽來河裏飲踏殺鯉魚兒

建中童謠一首

此水連涇水雙珠血滿川青牛將赤虎還賀太平年

賦君山

袁氏少年

二首

風波千里闊臺榭半天高此興將何比身如插羽毛

賦南嶽廟

峰巒多秀色松桂足清聲自有山林趣全忘城闕情

賦羅浮山

羅浮南海外昔日已聞之千里來游覽幽情我自知

寄薛侍御

楊巨源

一首

世上無窮事生涯莫廢詩何曾好風月不是憶君時

洛川吟贈張鬱

翠幄女子

二首

彩雲入帝鄉白鶴又徊翔久留深不可達島路遐長
空愛長生術不是長生人今日洛川別可惜洞中春

偶題

蒼頭捧劍

一首

青鳥銜蒲萄飛上金井欄美人恐驚去不敢捲簾看

送南中尉

吏部選人

羨君初拜職嗟我獨無名且是正員尉全勝兼試卿

泊舟浯溪

蔡京一首

停橈積水中舉目孤煙外伯閣浯溪人誰家有山賣

萬首唐人絕句卷第二十三

萬首唐人絕句卷第二十四

五言一百首

將游上苑

武后一首

明朝游上苑火急報春知花須連夜發莫待曉風吹

灞橋待李將軍

長孫無忌一首

颯颯風葉下遙遙煙景曛霸陵無醉尉誰滯李將軍

長寧公主宅流杯池

景龍文館學士九

攀藤招逸客偃桂叶幽情水中看樹影風裏聽松聲

其二

携琴待叔夜負局訪安期不應題石壁為記賞山時

其三

泉石多仙趣巖壑寫奇形欲知堪悅耳唯聽水泠泠

其四

巖壑恣登臨瑩目復怡心風篁類長笛流水當鳴琴

其五

懶步天台路誰登地肺山幽巖仙桂滿今日恣情攀

其六

暫遊仁智所蕭然松桂情寄言棲遯客勿復訪蓬瀛

其七

瀑溜晴疑雨叢篁晝似昏山中真可翫暫請報王孫

其八

傍池聊賦筆倚石旋題詩預彈山水調終擬待鍾期

其九

橫鋪豹皮褥倒戴鹿胎巾借問何為者山中有逸人

贈喬侍御

陳子昂 二首

漢廷榮巧宦雲閣薄邊功可憐驄馬使白首為誰雄

別異侍御

有道君匡國無悶余在林白雲我媚上歲晚來相尋

奉蕭中令酒

張說 十首

樂奏天恩漏盃來秋興高更蒙蕭相國對酒飲醇醪

奉宇文黃門酒

聖德垂甘露天章下大風又乘黃閣賞願作黑頭公

清夜酌

秋陰士多感雨息夜無塵清尊宜明月復有平生人

醉中作

醉後無窮樂彌勝未醉時動容皆是舞出語總成詩

送梁知微渡海東

今日此相送明年此相待天上客星回知君渡東海

寄劉道士馬

真人紫絳氣邀我丹田宮遠寄雙飛鳥飛飛不礙空

書能和尚塔

大師捐世去空餘法力在遠寄無礙香心隨到南海

江中誦經

實相歸懸解虛心暗在通澄江明月內應是色成空

元朝

元日今歲樂不謝往年春知向來心道誰爲昨夜人

耗磨日飲

耗磨傳茲日縱橫道未宜但令不忌醉翻是樂無爲

歸汝墳莊

祖詠四首

漚麻入南澗刈楚向東菑對酒雞黍熟閉門風雪來

寄王長史

汝穎俱宿好往來託層巒終日何寂寞繞籬生蕙蘭

長樂驛別盧象

朝來已握手宿別更傷心灞水行人絕商山驛路深

宿李明府客堂

旅宿倦愁卧空堂聞曉更風簾搖燭影秋雨帶蟲聲

題輞川圖

王維一首

宿世謬詞客前生應畫師不能捨餘習偶被時人知

夜宿山寺

李白一首
謂為楊億非

危樓高百尺手可摘星辰不敢高聲語怕驚天上人

游涇川琴溪

武平一首

環潭澄曉色疊嶂照秋影幽致忻所逢紛慮自茲屏

早發韶州

宋之問二首

綠樹秦京道青雲洛水橋故園長在目竟去不須招

別杜審言

卧病人事絕嗟君萬里行河橋不相送江樹遠含情

石榴

孔昭安一首

可憐中庭樹移根逐漢臣只為來時晚開花不及春

送金城公主

閻朝隱一首

鹵簿山川闡琵琶道路長回瞻父母國日出在東方

出塞

沈佺期 一首

飢烏啼舊壘疲馬思空城辛苦臯蘭北胡霜犯塞兵

詠葉

孔德紹 一首

早秋驚葉落飄零似客心翻飛未肯下猶言借故林

流所贈張錫

章玄同 一首

黃葉因風下甘從洛浦隈白雲何所為還出帝鄉來

秋池一枝蓮

郭恭 一首

秋至皆零落凌波獨吐紅託根方得所未肯即隨風

隔壁聞奏妓

裴延 二首

徒聞管絃切不見舞腰回賴有歌梁共塵飛一半來

詠剪花

花寒未聚蝶艷色已驚人懸知陌上柳應妬手中春

藍溪雜詠 九首

錢起 十一首

晚歸鷺

池上靜難厭雲間欲去晚忽背夕陽飛剩與清風遠

窓裏山

遠岫見如近千重一窓裏坐來石上雲乍謂壺中起

竹嶼

幽鳥清漣上興來看不足新篁壓水低昨夜鴛鴦宿

砌下泉

穿雲來自遠激砌流偏駛能資庭戶幽更引海禽至

戲鷗

乍依菱蔓聚盡向蘆花滅更喜好風來數片翻晴雪

遠山鍾

風送出山鍾雲霞度水淺欲尋聲盡處鳥滅寥天遠

池上亭

臨池架杏梁待客歸煙塘水上褰簾好蓮間杜若香

田鶴

田鶴望碧霄無風亦自舉單飛後片雲早晚及前侶

南陂

家住鳳城南門臨古陂曲時憐上林鴈半入池塘宿

送李明府去官

謗言三至後直道歎何如今日藍溪水無人助夜漁

言懷

夜月霽未好雲泉堪夢歸如何建章漏催著早朝衣

自感四首

侯夫人 五首

庭絕玉輦迹芳草漸成窠隱隱聞簫鼓君恩何處多
欲泣不成淚悲來翻強歌庭花方爛漫無計柰春何
春陰正無際獨步意如何不及閑花草翻承雨露多
糝成多自恨夢好却成悲不及楊花意春來到處飛

遺愁

秘澗扃仙卉雕房鎖玉人毛生真可戮不肯寫昭君

逢白公

元稹一首

遠路事無限相逢唯一言月色照榮辱長安千萬門

房公舊竹亭聞琴

李澣一首

石室寒飈警孫枝雅器裁坐來山水操絃斷弔塵埃

題水西寺

杜牧一首

三日去還住一生焉再遊含情碧溪水重上粲公樓

書憤

張祜四首

三十未封侯顛狂遍九州平生鏌鋌劍不報小人讎

題孟處士宅

高才何必貴下位不妨賢孟簡雖持節襄陽屬浩然

首陽竹

首陽山上路孤竹節長存為問無心草如何庇本根

題僧影堂

寒葉墜清霜空簾著燼香生前既無事何事更悲傷

誠貪

子蘭一首

多求待心足未足旋傾覆明知貪者心求榮不求辱

嘲刺蝟

朱貞白二首

行似針氈動卧似栗毬圓莫欺如此小誰敢便行拳

格子屏風

道格何曾格言糊又不糊渾身總是眼還解識人無

夢贈李愬

天津道士一首

聳轡排金闕乘軒上漢杏浮名何足戀高舉入煙霞

送兄

如意女子一首

別路雲初起離亭葉正稀所嗟人鴈異不作一行飛

戲詠蛙

楊收三首

兔邊分玉樹龍底耀銅儀會當同鼓吹不復問官私

詠筆

雖非囊中物何堅不可鑽一朝操政柄定使冠三端

嘲吳人壓門藩

爾非羸角者何用觸吾藩若是升堂者還應自得門

佳人照鏡

張文恭一首

倦采靡蕪葉貪憐照膽明兩邊俱拭淚一處有啼聲

述懷

唐怡一首

萬事皆零落平生不可思唯餘酒中趣不減少年時

閨怨

沈如筠二首

鴈盡書難寄愁多夢不成願隨孤月影流照伏波營

隴底嗟長別流襟一動君何言幽咽所更作死生分

古歌

沈千運一首

北邙不種田但種松與栢松栢未生處留待市朝客

卧街犯禁

裴脩然一首

這莫皜皜鼓須傾滿滿盃金吾如借問但道玉山頽

夢陰真君

趙自然一首

常欲棲山島閑眠玉洞寒丹哥時引舞來去跨雲鸞

戰袍中金鎖

僖宗宮人一首

玉燭製袍夜金刀呵手裁鎖寄千里客鎖心終不開

與謝生聯句

越溪楊女二首

珠簾半牀月青竹滿林風何事今宵景無人解與同

春日

春盡花隨盡其如自是花從來說花意不過此容華

上崔殼二首

延福里筆精

昔荷蒙恬惠尋遭仲叔投夫君不指使何處覓銀鉤

學問從君有詩書自我傳須知王逸少名價動千年

占曆日包橘

江西射覆客一首

太歲當頭立諸神莫敢當其中有一物常帶洞庭香

題青龍寺門

合寺
苟卒

京師客一首

龕龍東去海時日隱西斜敬文今不在碎石入流沙

詠元嘉中兄弟

元氏犬一首

言我不能歌聽我歌梅花今年故復可那汝明年何

游琴溪

邢巨

一首

靈溪非人迹仙意素所秉鱗嶺森翠微澄潭照秋景

送人往宣城

潘佐

一首

江畔送行人千山生暮氛謝安團扇上為畫敬亭雲

登清居臺

魏巒

一首

迤邐清居臺連延白雲外側聆天工語下視飛鳥背

上元日放二雉

司空圖

一首

嬰網雖皆困褰籠喜共歸無心期爾報相見莫驚飛

贈謝府君

吳興神女

一首

玉釵空中墮金鈿色已歇獨泣謝春風秋夜傷明月

頭上朱書

太湖魚

一首

九登龍門天三飲太湖水必竟不成龍見殺張公子

贈華山游人

毛女正美

一首

藥苗不滿筥又更上危巔回首歸去路相將入翠煙

藥圃

夏侯子雲

一首

綠葉紅英遍仙經自討論偶移巖畔菊鋤斷白雲根

陽春曲

商七七

一首

愁見唱陽春令人離腸結郎去未歸家柳自飄香雪

醉後贈馬四

孟浩然

二首

四海重然諾吾常聞白眉秦城遊俠客相得半酣時

浙江舟中

八月觀濤罷三江越海濤回瞻魏闕路無復子牟心

鞏路感懷

呂溫 二首

馬嘶白日暮劍鳴秋氣來我心眇無際河上空徘徊

楚州追制後舍弟長安失囚花下共飲

天子收都印京師責獄囚狂兄與狂弟不解對花愁

題西施石

王軒 一首

嶺上千峯秀江邊細草春今逢浣紗石不見浣紗人

萬首唐人絕句卷第二十四

萬首唐人絕句卷第二十五

五言一百首

舞二首

虞世南

繁絃奏淶水長袖轉回鸞一雙俱應節還似鏡中看

低身鏘玉佩舉袖拂羅衣對簷疑燕起映雪似花飛

菊

陳叔達 一首

霜間開紫帶露下發金英但令逢採摘寧辭獨晚榮

春雪

東方虬 一首

春雪滿空來觸處是花開不知園裏樹若箇是真梅

逢謝偃

高適 一首

紅顏愴別後白髮始相逢唯餘昔時意無復昔時容

古別離

孟郊八首

欲別牽郎衣郎今到何處不恨歸來遲莫向臨邛去

古興

楚血未乾衣荆虹尚埋輝痛玉不痛身抱璞求所歸

游子

萱草生堂階游子行天涯慈親倚堂門不見萱草花

看花

三年北村落春色入心悲料得一孀婦經時獨淚垂

贈契公

師住青山寺清華常遶身雖然到城郭衣上不棲塵

留和郢不得送之江南

剛有下水船白日留不得老人獨自歸苦淚滿眼黑

喜雨

朝見一片雲暮成千里雨淒清濕高枝散漫沾荒土

春後雨

昨夜一霎雨天意蘇羣物何物最先知虛庭草爭出

知非

權德輿一首

名教自可樂搢紳貴行道何必學狂歌深山對豐草

溪居

裴度一首

門徑俯清溪茅簷古木齊紅塵飄不到時有水禽啼
清溪泛舟 張顛 一首

旅人倚征棹薄暮起勞歌笑攬清溪月青輝不厭多

覽鏡

李嗣宗 一首

歲去紅顏盡愁來白髮新今朝開鏡匣疑是別逢人

題升山

任生 一首

城外升山寺城中望宛然及登無半日欲到已經年

丹陽作

朱柳 一首

暫入新豐市猶聞舊酒香抱琴沽一醉盡日卧垂楊

楊子津送人

朱放 三首

今朝楊子津忽見五溪人老病無餘事丹砂乞五斤

題竹林寺

歲月人間促煙霞此地多殷勤竹林寺能得幾回過

山中謁皇甫曾

尋源路已盡笑入白雲間不解乘輶客那知有此山

別落花

劉言史 一首

風艷霏霏去羈人處處游明年縱相見不在此枝頭

末秋到家

潘圖 一首

歸來無所利骨肉亦不喜黃犬却有情富門卧搖尾

尋隱不遇二首

無本

松下問童子言師采藥去只在此山中雲深不知處
聞說到揚州吹簫有舊游人來多不見莫是上迷樓

漢江晚望

皮日休一首

萬頃湖天碧一星飛鷺白此時放懷望不厭爲浮客

題季子廟

李季華一首

季子讓社稷又能聽國風寧知千載後蘋藻滿祠宮

晚望

貫休三首

落日碧江靜蓮唱清且閑更尋花發處借月過前灣

早霜寄蔡大

昨夜楚鍾鳴飛霜下楚城定知遷客鬢先向鑑中生

月夕

霜月夜徘徊樓中羌管催曉風吹不盡江上落殘梅

秋蝶二首

羅鄴三首

秦樓花發時秦女笑相隨及到秋風日飛來欲問誰
似厭栖寒菊翩翩古晚陽愁人如見此應下淚千行

秋別

別路山陽柳秋風淒管絃青樓君去後明月爲誰圓

江上楓

成文幹三首

江楓自翦鬱不競松筠力一葉落漁家殘陽帶秋色

夜夜曲

自從君去夜錦幌孤蘭麝欹枕對銀缸秦箏綠窻下

村行

暖暖村煙暮牧童出深塢騎牛不顧人吹笛尋山去

戲詠興善寺佛殿災 李榮道士一首

道善何曾善言興又不興如來燒亦盡唯有一羣僧

同洛陽李少府觀永樂公主入蕃 孫逖

邊地鶯花少年來未覺新美人天上落龍塞始應春

御溝水 盧肇一首

萬壑朝溟海縈回歲月多無如此溝水咫尺奉天波

早行遇雪 石召一首

荒郊昨夜雪羸馬又須行四顧無人迹雞鳴第一聲

喜入長安 崔湜一首

雲日能催曉風光不惜年賴逢征路盡歸在落花前

洛中 皇甫曾一首

還鄉不見家年老眼多淚車馬上河橋城中好天氣

水閣 朱景玄九首

樓居半池上澄影共相空謝守題詩處蓮開淨碧中

迎風亭

山雨留清氣溪颺送早涼時回石門步階下碧雲光

雙楹亭

連簷對雙樹冬翠夏無塵未肯慙桃李成陰不待春
蓮亭

回塘最幽處拍水小亭開莫恠欄干濕鷓鴣夜宿來
中峯亭

中峯上翠微惚曉早霞飛幾引登山屐春風踏雪歸
飛雲亭

上結孤圓頂飛軒出泰清有時迷處所梁棟曉雲生
四望亭

高亭羣峯首四面俯清川每見晨光曉堦前萬井煙
望蓮臺

秋臺好登望茵茵發清池半似紅顏醉凌波欲暮時

茶亭

靜得塵埃外茶芳小華山此亭真寂寞世路少人間

郊原晚望懷李秘書

左偃 五首

歸鳥入平野寒雲在遠村徒令睇望久不復見王孫
言懷別同志

漸老將誰託勞生每自慚何當重携手風雨滿江南
漢宮詞

寒燭照清夜笙歌隔蘚墻一從飛燕入便不見君王
送君去

關河月未曉行子心已急佳人無一言獨背殘燈泣

秋晚野望

倚筇聊一望何處是秦川草色初晴路鴻聲欲暮天

花落

盧士衡一首

迎風嘯未已和雨落穀穀千枝與萬枝不如一竿竹

詠黃鶯兒

鄭愔一首

欲轉聲猶澁將飛羽未調高風不借便何處得遷喬

詣李侍郎

王夢周三首

文字元無底功夫轉到難苦心三百首暫請侍郎看

弔靈均

萬古汨羅深騷人道不沉明明唐日月應見楚臣心

弔韓侍郎

星落少微宮高人入古風幾多才子淚併寫五言中

傷春

李昌符

即是春風盡仍霑夜雨歸明朝更來此兼恐落花稀

石城

蔣吉四首

繫纜石城下恣吟懷暫開江人橈艇子將謂莫愁來

寄進士賈希

恨苦淚不落耿然東北心空囊與瘦馬羈繼意應深

高溪有懷

駐馬高溪側旅人千里情
鴈山山下水還作此泉聲
漢東道中

九十九岡遙天寒雪未消
羸童牽瘦馬不敢過危橋

田家

王建二首

啾啾雀滿樹霏霏東坡雨
田家夜無食水中摘禾黍

秋燈

向壁對孤燈秋幃寒寂寂
斜照碧山圖松間一片石

對月

張喬二首

圓魄上寒空皆言四海同
安知千里外不有雨兼風

夜漁

釣艇去悠悠煙波春復秋
唯將一點火何處宿蘆洲

同司空君過堅上人故院

李端一首

我與雷居士平生事遠公
無人知是舊共到影堂中

同賦

司空文明一首

舊依支遁宿曾與戴顓來
今日空林下唯知見綠苔

梁城老人怨

陳羽一首

朝爲耕種人暮作刀槍鬼
相看父子血共染城壕水

春雪

何仲言十四首

可聞不可見能重復能輕
鏡前飄落粉琴上聽餘聲

送褚都曹

君隨結客去我乃倦遊歸本願同栖宿今成相背飛
送馬舍人五城

隕風飄岸葉行雨暗江流居人會應返空欲送行舟

苑中見美人

羅袖風前卷玉釵林中耀團扇承落花復持掩面笑

邊城思

柳黃未吐葉水綠半含苔春色邊城動客思故鄉來

送司馬長沙

獨留信南浦望別乃西浮以今笑為別復使夏成秋

為人妾怨

燕戲還簷隙花飛落枕前寸心悲不見拭淚坐調絃

機中刺繡所憇下朝粧處未憶神已傷欲忘悲不去

相送

客心已百念孤遊重千里江暗雨欲來浪白風初起

閨怨

竹葉響南牕月光照東壁誰欲夜獨覺枕前雙淚滴

閨閣行人斷房櫳月影斜誰能北牕下獨對後園花

苑中

苑門閉千扇苑戶開萬扉樓殿聞朱履竹樹隔羅衣

離夜聽琴

別離既有緒琴瑟反成悲美人多怨態亦復慘長眉

相送

高軒雖暫駐餘日夕無暉以我辭鄉淚沾君送別衣

寄僧知乾

裴說一首

貌高清入骨帝里舊臨壇出語經相似行心佛證安

近詩三首

奚銑金雞

舞鏡爭鸞綵臨場定鶻拳正思仙仗日翹首御樓前
養鬪形如木迎春質似泥信如風雨在何憚跡卑棲
為脫田文難常懷紀消恩欲知踈野態霜曉叫荒村

奉和聖製過潼津關

蘇頲五首

在德何夷險觀風復往還自然同善閉中路可無關

山驛閑卧即事

息燕歸簷靜飛花落院閑不愁愁自着誰道憶鄉關

汾上驚秋

北風吹白雲萬里度河汾心緒逢搖落秋聲不可聞

合風賦將赴益州題小園壁

歲窮唯益老春至却辭家可惜東園樹無人也作花

詠禮部尚書廳後鵲

時將重入蜀

懷印喜將歸窺巢變且依自如棲不定還欲向南飛

答蘇尚書赴益州

宋璟一首

我望風煙接石行霞雪霏園亭若有送楊柳最依依

同賦

鄭惟忠

離憂將歲盡歸望逐春來庭花如有意留艷待人來

雨中對後簷叢竹

崔元翰

一首

含風搖硯水帶雨拂墻衣乍似秋江上漁家半掩扉

答苗介立

胃藏瓠

一首

烏鼠是家川周王昔獵賢一從離子卯應見海桑田

萬首唐人絕句卷第二十五

萬首唐人絕句卷第二十六

六言

田園樂七首

王維

出入千門萬戶經過北里南鄰蹠蹶鳴珂有底崆峒
散髮何人

其二

再見封侯萬戶立談賜璧一雙詎勝耦耕南畝何如
高卧東窓

其三

采菱渡頭風急策杖村西日斜杏樹壇邊漁父桃花

源裏人家

其四

萋萋春草秋綠落落長松夏寒牛羊自歸村巷童稚未識衣冠

其五

山下孤煙遠村天邊獨樹高原一瓢顏回陋巷五柳先生對門

其六

桃紅復含夜雨柳綠更帶春煙花落家童未掃鶯啼山客猶眠

其七

酌酒會臨泉水抱琴好倚長松南園露葵朝折東舍黃梁夜春

宿甌山寺二首

韓翃

山中今夜何人闕下當年逐臣青瑣應須早去白雲何用相親

其二

一身趨侍丹墀西路翩翩去時惆悵青山綠水何年更是來期

三臺詞二首

韋應物

一年一年老去明日後日花開未報長安平定萬國
豈得銜盃

其二

冰泮寒塘始綠雨餘百草皆生朝來門閤無事晚下
高齋有情

尋山居

劉長卿 三首

危石纔通鳥道空山更有人家桃源定在深處澗水
浮來落花

送陸澧還吳中

一云李嘉祐

瓜步寒潮送客揚花暮雨沾衣故山南望何處秋火

連天獨歸

赴潤州留別鮑侍御

對水看山別離孤舟日暮行遲江南江北春草獨向
金陵去時

小江懷靈一上人

皇甫冉 三首

江上年年春早津頭日日人行借問山陰遠近猶聞
薄暮鍾聲

送鄭二之茅山

水流絕澗終日草長深山暮雲犬吠鷄鳴幾處條桑
種杏何人

問李二司直所居雲山

門外水流何處天邊樹繞誰家山絕東西多少朝朝
幾度雲遮

回波詞

李景伯 一首

回波爾時酒卮微臣職在箴規侍宴既過三爵喧呼
切恐非儀

回波詞

沈佺期 一首

回波爾時佺期流向嶺外生歸身名已蒙齒錄袍笏
未復牙緋

回波詞

裴談 一首

回波爾時栲栳怕婦也是大好外邊祇有裴談內裏
無過李老

答劉夢得二首

白居易

楊子津頭月下臨都驛裏燈前昨日老於前日去年
春似今年

其二

謝守歸為祕監馮唐老作郎官前事不須問著新詩
且更吟看

答樂天

劉禹錫 三首

北固山邊波浪東都城裏風塵世事不同心事新人

何似故人

其二

一政政官軋軋一年年老駸駸身外名何足筭到來
詩且同吟

酬楊侍郎

十年毛羽摧頽一旦天書召回看看瓜時欲到故侯
也好歸來

剡溪舟行

朱放一首

月在沃洲山上人歸剡縣溪邊漠漠黃花覆水時時
白鷺驚船

歸山

顧況一首

心事數莖白髮生涯一片春山空林有雪相待古路
無人獨還

宮中三臺詞二首 王建六首

魚藻池邊射鴨芙蓉園裏看花日色柘黃相似不着
紅鸞扇遮

其二

池北池南草綠殿前殿後花紅天子千秋萬歲未央
明月清風

江南三臺詞四首

揚州橋邊小婦長千市裏商人三年不得消息不自
拜鬼求神

其二

青草臺邊草色飛猿嶺上猿聲萬里三湘客到有風
有雨人行

其三

樹頭花落花開道上人去人來朝愁暮愁即老百年
幾度三臺

其四

聞身強健且爲頭白齒落難追准擬百年千歲能得

幾許多時

奉寄皇甫補闕

張繼一首

京口情人別久揚州估客來踈潮至尋陽回去相思
無處通書

塞姑一首

昨日盧梅塞口整見諸人鎮守都護三年不歸折盡
江邊楊柳

詠八十一顆

薛濤一首

色比丹霞朝日形如合浦圓璫開時九九知數見處
雙雙頡頏

揚州橋邊小婦長干市裏商人三年不得消息
自拜鬼求神

其二

青草臺邊草色飛猿嶺上猿聲萬里三湘客到有風
有雨人行

其三

樹頭花落花開道上人去人來朝愁暮愁即老百年
幾度三臺

其四

聞身強健且爲頭白齒落難追准擬百年千歲能得

幾許多時

奉寄皇甫補闕

張繼一首

京口情人別久揚州估客來踈潮至尋陽回去相思
無處通書

塞姑一首

昨日盧梅塞口整見諸人鎮守都護三年不歸折盡
江邊楊柳

詠八十一顆

薛濤一首

色比丹霞朝日形如合浦圓璫開時九九知數見處
雙雙頡頏

春野作

貫休 一首

閑步淺青平綠流水征車自速誰家挾彈少年擬打
紅衣啄木

寄李袁州桑落酒 郎士元 一首

色比瓊漿猶嫩香同甘露仍春十千提携一斗遠送
瀟湘故人

萬首唐人絕句卷第二十六



